

Nafarroako Eskola Kontseiluak ez du onartu alfabetatzea helduen irakaskuntzan sartzea

AEK eta IKArekin hitzarmenak lotu nahi zituen ezetsitako proposamenak

Alberto Barandiaran / Iruñea

Nafarroako Eskola Kontseiluak, joan den ekainaren 29an egin zuen bileran, errefusatu egin zituen Helduentzako Irakaskuntza arautzeko zirriborroari Ikastolen Elkarteak eginiko zuzenketak oro, helduen alfabetatzea AEK eta IKArekin gainean uzteko eskatzen zuena barne. Honen bidez bi erakunde hauen onarpena lortu nahi zuen Elkarteak.

«LURRALDE honetan oraindik bada jendea ez dakiena edo jakin nahi ez duena bi mintzaira, bi hizkuntza ofizial ditugula». Ikastolen Elkarteak lehendakari Pello Mariñelarenaren ustetan, joan den ekainaren 29an aukera polita galdu zen helduen alfabetazio eta euskalduntzea helduen irakaskuntzaren alorraren baitan sartzeko, hau da, aukera emateko baldintzak hobetu eta lan egokiagoa egiteko. Baina hori gabe, Hezkuntza Departamentua, sindikatuak, ikastetxeetako ordezkariak eta gurasoen elkarteak biltzen dituen Eskola Kontseiluak gaitzetsi egin zituen euskararen aipua zuten aldaketarako proposamen guztiak.

Joan den hilaren bukaeran izan zen bilera, esan bezala. Hantxe aztertzeoak ziren Hezkuntza Departamentuak eginiko zirriborroak Helduentzako Irakaskuntza arautzeko. Hamalau zuzenketa aurkeztu zituen Ikastolen Elkarteak, ia gehienak euskararen presentzia gogoraratzekoak. Horrela, «komunitatearen bi



AEK eta IKA erakundeek Iruñeko kaleetan deitutako manifestazioa.

hizkuntzetan» esaldia gehitzea hiru aldiz planteatu zen eta gehienak alfabetazio eta euskalduntzea irakaskuntza mota honen barruan sartzera bideratuta zeuden. Beste batetik, «kulturarteko elkarbizitzan hezitzeko» zioen tokian, «kultur eta hizkuntzarteko elkarbizitzan hezitzeko» sartzeari planteatu zuen, eta izan zen ere «nafar errealitateri dagokionez» zioen tokian, «nafar errealitate, hizkuntza eta kulturari dagokienez» eskatu zuena.

Gogoratu behar da Hezkuntza Departamentuak bidali egiten dituela maizgaiak Eskola Kontseilura, honen epaia, loteslea izan gabe ere, oso garrantzitsua

delako, eta gutxitan ateratzen dela aurrera proiekturen bat bere oniritzirik gabe. Bada, beste zuzenketa baten bitartez administrazioko ordezkariak moztu egin zuten bidea haiek aurkeztutako testuan aldaketak planteatzeko. Ez zen ezta bozketarik egin ere.

«Barruan egon beharko luke»

Hori ikusita, Mariñelarenak xedapen gehigarria sartzeko eskatu zuen, testu honekin: «Nafarroako Eskola Kontseiluak premiatu nahi du administrazioa, hitzarmenak bultzatzen helduentzako euskarazko irakaskuntzako

gizarte ekimenerako zentroekin, egungo benetako egoerarekin egokitzeke, bai ekonomikoki bai pedagogikoki». Bozketa egin zen, eta bost baietz, 13 ezetz eta bost abstentzio izan zen emaitza.

Mariñelarenak onartzen du helduen alfabetatze behartuta sartu nahi izan zutela helduen irakaskuntzaren barruan, «baina berez hori barruan egon beharko luke, horrela izango lukeelako formakuntzarako aukera, eta hitzarmen errealak lortu litezkeelako horrela».

Aldaketok kontuan hartu gabe, ordea, Nafarroako Gobernua azken ukituak ematen ari zaizkio jada lege proiektuari.

NUPeko errektore taldeko kideek beren karguak hartu dituzte

■ Antonio Perez Prados errektoreak aurkeztu zituen hurrengo urteotan lankide izango dituen pertsonak

Europa Press / Iruñea

NAFARROAKO Unibertsitate Publikoko (NUPeko) errektore talde berriko kideek karguen zina egin zuten atzo unibertsitatean izandako ekitaldian.

Errektore talde berria honako hauek osatuko dute: Julio Lafuente, Irakasletoa eta Antolakuntza Akademikoko errektoreordea; Antonio

Purroy, Ikerketa eta Teknologia Transferentziako errektoreordea; Maria Reyes Berrueto, Ikasleria eta Unibertsitate Zabalkundea; Juan Francisco Franco, Institutio Arteko eta Nazioarteko Harremanak; Jose Miguel Mugika, Antolakuntza eta Ekonomia; eta Joaquín Sevilla, Teknologia Berriak eta Hezkuntza Berrikuntza.

Errektoreordeez gain, sai-

letako zuzendariak eta beste zenbait kargu ere beren postuak hartu zituzten atzo saioan. NUPeko zuzendari nagusia Patricio Hernandez izango da, Euskararako Errektorearen laguntzailea Ildefonso Grande eta Unibertsitatean Sartzeko koordinatzaile nagusia Jose Luis Goñi.

Bestetik, entzunketa tramitea egin ondoren erabaki

zuten gerente postua Ignacio Maria Rekondori ematea.

NUPeko errektoreak ekitaldiari hasiera eman zion, eta ondoren idazkari nagusiaren postua utzi berri duen Jesus Maria Oses idazkari nagusi berriaren izena irakurri zuen.

Ondoren, idazkari nagusi berriak, banan-banan, kargu berri guztiak deitu zituen, eta beren karguen zina egin zuten.

Eskola materialaren salmenta legeari egokitu behar zaiola gogoratu du Eusko Jaurlaritzak

■ Industria Sailak ikuskatze kanpaina egingo du irailean

Errdakzioa / Donostia

ARABAN, Gipuzkoan eta Bizkaian irakaskuntza zentroetan egiten den eskola materialaren salmenta Maiatzaren 27ko 7/94 legearen arabera egin behar dela ohartarazi du Industria, Merkataritza eta Turismo Sailak, komunikabideetara igorritako prentsa ohar batean.

Jaurlaritzak onartu du urtero ikamikak sortzen direla salmenta horien inguruan, eta horregatik egin du azalpena. Gainera, elkarte batzuek egiten duten eskola materialaren salmenta, behin-behineko salmentatzat jo daitekeela gogorarazi du, hiru baldintzarekin: behin betiko merkataria ezaugarria ez duten establezimenduetan saltzea, hilabete baino gutxiagoko epean egitea salmenta, eta salmenta ibiltaria ez izatea. Salmenta hori Donostian, Bilbon eta Gasteizen Industria, Merkataritza eta Turismo Sailak dituen bulegoetan baimendu behar dela gogoratu du.

EHUK 560 milioi pezeta gastatu zituen iaz, bere liburutegietarako materialean

Errdakzioa / Donostia

EUSKAL Herriko Unibertsitateak 800 milioi pezeta inguru gastatu zituen iaz bere liburutegietarako materialean. Gehiena -564 milioi pezeta- material bibliografikoetan xahutu zuen. Erosketa horiei esker, EHUKo liburutegietan 41.620 ale berri daude.

Ikastaroan zehar, EHUko bibliotekak 339.000 liburu mailegatu zituen, 22.000 erabiltzaile diferenteren artean, gehienak ikasle eta irakasleak.

Gainera, EHUK lortu zuen hitzarmen bat sinatzea Jaurlaritzarekin, Arabako Foru Aldundiarekin eta Gasteizko Udalarekin, liburutegi zentral bat irekitzeko Gasteizen. Orain bakararra dago, Leioan.